

SUARAMIMBAR

INFORMATIF, INOVATIF & INKLUSIF

**SEDEKAH DALAM MUSIBAH:
“BERAT SAMA DIPIKUL,
RINGAN SAMA DIJINJING”**

m/s 6



Pedihnya
Azab Neraka

m/s 14

Jenazah
Dimandikan
Malaikat

m/s 18

Siapa
Wanita
Solehah?

m/s 20

لهم إنا نسألك ملائكة حنونا
LEMBAGA AMANAH KEBAJIKAN
MASJID NEGERI SARAWAK





لَمَبْجَانِي مَسْجِدِي نَجِيَّا مَنْجِيَّا
LEMBAGA AMANAH KEBAJIKAN
MASJID NEGERI SARAWAK

lakmns.org.my

[lakmnsofficial](#)

[lakmnsofficial](#)

[IRIS](#)

SIDANG REDAKSI

PENAUNG

YBhg. Tan Sri Datuk Amar (Dr) Haji Abdul Aziz bin Dato Haji Husain

PENASIHAT

YBhg. Datuk Haji Abang Abdul Wahap bin Haji Abang Julai
Encik Mohamad Feisal bin Said

PANEL EDITOR

Puan Megawati binti Julaihi

Puan Nona Zaharia binti Fadzil

Encik Abang Bikusary bin Haji Kadir

Puan Siti Emiliana binti Mohamad Edmund

Encik Khasmady bin Mahidi

SUB-EDITOR

Puan Haryati binti Mohamad

PENOLONG SUB-EDITOR

Mohamad Hanif bin Abdudullah

PENULIS/PENGARANG

Puan Dayang Siti Aisyah bin Mohd Atei

Cik Nur Amira binti Sharkawi

Puan Afnalizan binti Ali

Ustaz Wan Abid Asyur bin Wan Khata

Ustaz Mohd Khalid Hafeez bin Mohd Nazir

Ustazah Nur Hazwani binti Kuswadi

Ustaz Rohaizat bin Rejab

Puan Nurulzia binti Ibrahim

Cik Jamilah Anisa Binti Johan

Encik Abang Zulkernain Bin Abang Yusuf

Encik Muhamad Hafiz Fadilah Bin Bahar

Encik Mohd Nurulhady Bin Morshidi

PEREKA GRAFIK

Heiruzam Filani bin Mohamad

JURUGAMBAR

Hadihizami bin Haidi

PENYELENGGARA/KOORDINATOR

Unit Penerbitan, Bahagian Publisiti dan Komunikasi

DENGARKAN
RADIO ISLAMIK SARAWAK YANG PERTAMA
Isnin - Jumaat 10 Pagi - 4 Petang



Informatif, Inovatif & Inklusif



Assalamualaikum warahmatullahi wabarakatuh,

Alhamdulillah, syukur kita rafakkan kepada al-Khaliq, kerana di atas sifat ar-Rahman dan ar-Rahim, kita masih diberikan udara segar untuk kita bernafas hingga ke hari ini.

Kepada sidang pembaca yang budiman, terima kasih di atas sokongan kepada penerbitan majalah ini. Sesungguhnya sokongan para pembaca menjadi satu daya penolak untuk kami bergerak ke hadapan untuk menghasilkan sesuatu yang lebih ranum isinya sebagai santapan minda pembaca.

Penerbitan kali ini bukanlah sesuatu yang baru. Ia adalah kesinambungan daripada penerbitan Buletin Mimbar yang telah kami terbitkan sejak penghujung 1980-an. Rombakan yang kami lakukan ini tidak lain, adalah untuk membuka ruang perspektif yang lebih luas kepada pembaca untuk mendapatkan secebis ilmu di samping sebagai wadah perkongsian ilmu agama. Justeru, penulisan di dalam penerbitan kali ini, diharapkan menjadi satu bahan bacaan yang berkualiti dan bermanfaat.

Tahun baharu Hijrah yang kita raikan baru-baru ini juga menjadi titik tolak buat kami di LAKMNS untuk turut berhijrah ke lapangan yang lebih baik, iaitu melakarkan cebisan ilmu melalui penerbitan ini yang kami jenamakan semula sebagai SUARA MIMBAR, Informatif, Inovatif dan Inklusif!

Selamat membaca.

Wassalam.

KANDUNGAN

EDISI 1 / JUL-SEP 2021



4

TRANFORMASI KE ARAH
SEBUAH BADAN AMANAH
ISLAM BERTARAF DUNIA



SEDEKAH
DALAM
MUSIBBAH



PENGORBANAN
DALAM MENEMPUH
UJIAN



SAMBUTAN
TAHUN BARU
HIJRAH



MANHAJ
RABBANI UMMAH
BERKUALITI



LAKMNS
HULUR
SUMBANGAN



MAHABBAH
MENYEMAI
KASIH SAYANG



PEDIHNYA
AZAB
NERAKA



ULAMA
TEMPATAN



JENAZAH
DIMANDIKAN
MALAIKAT



SINGA ALLAH



SIAPA
WANITA
SOLEHAH?




ASAS
ILMU
FIQH



BELIA DAN
ISLAM



ZULHIJJAH
BULAN
BERMESRA
DENGAN ALLAH



MANHAJ
AHLI SUNNAH
WAL JAMAAH



YOU ARE NOT YOUR
THOUGHTS YOU ARE
NOT YOUR
EMOTIONS



HIJRAH



MADU
LEBAH DARI
PANDANGAN
ISLAM



MEMBANGUNKAN
MASJID SEBAGAI
LANGKAH
PERTAMA



KALAU TAK
MENYIBUK,
TAK BOLEH
KE?



TIKET UNTUK
MENGADAP
ALLAH

LAKMNS: TRANSFORMASI KE ARAH SEBUAH BADAN AMANAH ISLAM BERTARAF DUNIA

MASJID DALAM ISLAM

Masjid merupakan sebuah institusi yang amat besar bagi umat Islam. Perkataan masjid berasal daripada istilah arab iaitu "sajada" yang bermaksud sujud. Maka, istilah masjid itu membawa makna sesuatu tempat untuk bersujud. Dalam erti kata lain, tempat untuk mendirikan solat.

Selain sebagai pusat ibadah terutamanya bagi mendirikan solat, masjid dalam tradisi Islam turut mempunyai fungsi dan peranan lain. Sebagai satu simbol syiar Islam, masjid turut berperanan sebagai pusat pendidikan, ekonomi, sosial serta kemasyarakatan, dan politik. Bagaimanapun, harus ditekankan di sini, politik dalam konteks ini bermaksud suatu wadah untuk membincangkan permasalahan ummah, dan bukannya platform politik partisan.

PERANAN LAKMNS

Ditubuhkan pada tahun 1958, Lembaga Amanah Kebajikan Masjid Negeri Sarawak, yang pada ketika itu dinamakan sebagai Lembaga Amanah Kebajikan Masjid Besar Kuching, diperbadankan pada tahun 1960, dibawah The Mesjid Besar (Kuching) (Charitable Trust) Order 1960. Berdasarkan peruntukan di bawah arahan ini, tujuan organisasi ini adalah, membantu golongan miskin di kalangan orang Islam di sekitar Kuching; menyediakan kemudahan keagamaan dan pendidikan bagi penduduk Islam sekitar Kuching; menyediakan, menyelenggarakan dan menambahbaik Masjid Besar yang terletak di Jalan Datu' dan mana-mana premis yang digunakan oleh Lembaga,

mengawalselia tanah perkuburan yang dimiliki Masjid Besar dan, menganjurkan program agama yang berlangsung di Kuching.

Pada 1986, terdapat beberapa pindaan pada peruntukan ini, termasuk penambahan pada aspek tujuan atau objektif penubuhan Lembaga. Setelah kerajaan negeri bersetuju untuk membina sebuah masjid baharu di Petra Jaya, LAKMNS diperuntukkan untuk "menyeleggara dan menambahbaik Masjid Negeri yang baharu, terletak di Petra Jaya, Kuching, dan mana-mana bangunan yang digunakan oleh pihak LAKMNS untuk tujuan keagamaan atau pendidikan."

Bagi menaiktaraf dan menambahbaik fungsi dan peranan LAKMNS, suatu ordinan telah diusulkan pada tahun 1994 untuk meminda ordinan yang sedia ada. Pada 19 Jun 1994, Tuan Yang Terutama Yang Di-Pertua Negeri Sarawak telah memperkenankan ordinan baru ini untuk diluluskan oleh Dewan Undangan Negeri Sarawak. Ordinan yang baru ini dinamakan sebagai Charitable Trusts Ordinance 1994 (Ordinan Lembaga Amanah Kebajikan, 1994).

CETUSAN TRANSFORMASI

Perkembangan teknologi maklumat dan serta luas parameter perhubungan masa kini sedikit sebanyak telah mengubah lanskap komunikasi atau sistem penyampaian. LAKMNS turut serta dalam perkembangan ini dengan melakukan pelbagai perubahan yang disifatkan sebagai satu transformasi yang menyeluruh.

Transformasi pertama yang dilakukan adalah penstrukturkan semula barisan pengurusan dengan melakukan beberapa rombakan pada struktur organisasi dengan penubuhan beberapa jabatan dan bahagian baharu. Tujuannya adalah untuk memastikan setiap jabatan atau bahagian memainkan fungsi dan peranan masing-masing dengan lebih berkesan.

Sebagai sebuah badan yang menyediakan perkhidmatan keagamaan, pendidikan dan sosial, LAKMNS sentiasa komited dalam memastikan perkhidmatan yang disediakan adalah pada tahap yang memuaskan. Perkara ini telah ditegaskan oleh Ketua Pegawai Eksekutif LAKMNS, Datuk Haji Abang Abdul Wahab bin Haji Abang Julai dalam Program Sembang Teh Tarik bersama CEO pada 22 Februari 2021 disertai wakil media. Beliau menegaskan bahawa usaha ini adalah bagi merealisasikan visi LAKMNS iaitu untuk menjadi badan amanah Islam yang bertaraf dunia.



MANFAAT PENGGUNAAN TEKNOLOGI

Di antara usaha tersebut adalah dengan memanfaatkan penggunaan teknologi maklumat seperti media sosial dan laman web untuk berkomunikasi dengan masyarakat umum. Bagi menambahbaik penyampaian maklumat, LAKMNS telah menaiktaraf laman web supaya lebih informatif dan mesra pengguna.

Skop perkhidmatan yang disediakan juga melibatkan penggunaan aplikasi teknologi iaitu "scan & donate", iaitu penyediaan platform digital bagi mereka yang ingin menyumbang ke tabung masjid seliaan LAKMNS iaitu Masjid Jamek Negeri Sarawak dan Masjid Bandaraya Kuching. Melalui perkhidmatan ini, pengguna boleh memberi sumbangan menggunakan aplikasi Boost, Sarawak Pay dan Maybank QR Code.



Selain itu, LAKMNS turut bekerjasama dengan agensi lain dalam menyediakan maklumat seperti menyediakan kiosk maklumat (Information Kiosk) di Masjid Bandaraya Kuching. Projek ini adalah merupakan usahasama bersama Kementerian Pelancongan, Kesenian dan Kebudayaan Sarawak, Universiti Malaysia Sarawak, dan OKSHe.



DAWKAH NORMA BAHARU

Mengambil kira perubahan pada pendekatan dakwah masa kini bersifat digital, LAKMNS melakukan inisiatif untuk menubah radio digital sebagai alternatif bagi mereka yang suka hiburan, dalam masa yang sama dapat menambah ilmu melalui perkongsian-perkongsian yang bermanfaat. Platform radio ini juga adalah bertujuan sebagai medium penyebaran maklumat di antara agensi Islam dan masyarakat khususnya di Negeri Sarawak. Di awal penyiarannya pada Julai 2020, IRIS hanya bersiaran pada jam 11.00 pagi sehingga 3.00 petang.



Bagaimanapun, sebagai usaha memperkasakan lagi penyampaian maklumat, siaran IRIS ditambah dari pukul 10.00 pagi hingga 4.00 petang bermula Januari 2021.

Memandangkan situasi semasa yang mencetuskan norma baharu di kalangan masyarakat, termasuk dalam soal pengimaranah masjid, LAKMNS mengambil inisiatif untuk memastikan program pengimaranah masjid turut diikuti oleh mereka yang tidak dapat hadir ke masjid disebabkan kekangan SOP. Justeru, LAKMNS melalui Unit Penerbitan telah membuat siaran langsung kuliah-kuliah terpilih melalui medium FB Live, di samping siaran langsung khutbah Jumaat setiap minggu dari Masjid Jamek Negeri Sarawak.

KHIDMAT FARDHU KIFAYAH

Dari segi perkhidmatan masyarakat, LAKMNS turut berusaha untuk memperbaiki serta menaiktaraf kemudahan sedia ada. Antara projek yang dalam perancangan adalah pembinaan Kompleks Pusara Islam Semariang (SICC) bertempat di Tanah Perkuburan Semariang (TPS) di mana majlis pecah tanah komplek tersebut telah diadakan pada 24 Disember yang lalu. Komplek ini adalah berkonsepkan one stop centre bagi kemudahan pengurusan jenazah.



Bagi keselesaan pengunjung TPS, LAKMNS turut mengadakan Program Mengindahkan Lanskap TPS. Antara inisiatif program ini adalah menyediakan fasiliti tambahan bagi kemudahan pengunjung seperti laluan pejalan kaki, pondok rehat di samping mengindahkan kawasan supaya lebih cantik, selesa dan selamat.

HARAPAN

Projek transformasi ini diharapkan akan menjadi satu permulaan yang baharu buat LAKMNS untuk terus ke hadapan dalam memastikan kebajikan umat Islam dijaga dengan baik melalui pembangunan institusi masjid. Dengan perkembangan teknologi serta perubahan norma kehidupan masyarakat, LAKMNS tampak dinamik dan inovatif dalam memastikan setiap program kebajikan memberi manfaat kepada umat Islam keseluruhannya.

SEDEKAH DALAM MUSIBAH

Disediakan oleh: Mohamad Hanif bin Abudullah, Pegawai Penerbitan, Bahagian Publisiti dan Komunikasi, LAKMNS

**BERAT SAMA
DIPIKUL,
RINGAN SAMA
DIJINJING**

Angka jangkitan Covid-19 dalam beberapa minggu ini nampaknya menunjukkan trend menurun. Bagi mengekang keadaan, kerajaan telah melaksanakan perintah kawalan pergerakan (PKP) dan dalam masa yang sama, proses vaksinasi juga berjalan di seluruh negara. Bagaimanapun, pelaksanaan PKP sedikit sebanyak telah menjelaskan banyak pihak terutamanya dari segi sumber pendapatan ekoran sekatan beberapa sektor ekonomi. Saban hari, media melaporkan kepayahan yang terpaksa ditempuhi mereka yang kurang berasib baik ini. Hatta, ada yang mengambil jalan singkat sehingga meragut nyawa sendiri. Na'uzubiLlaahiminzaalik.

Justeru, apakah yang harus kita lakukan? Dalam keadaan yang meruncing ini, bagi mereka yang tidak terjejas, seharusnya kita cakna dengan situasi semasa lebih-lebih lagi persekitaran sekeliling kita. Dalam kita berwaspada dengan jangkitan ini, moleknya kita juga perhatikan sekeliling kita kiranya ada di kalangan keluarga dan kejiranannya yang terputus rezeki. Berat mata memandang, berat lagi bahu yang memikulnya. Maka, menjadi kewajiban kita untuk menghulurkan bantuan semampunya. Dalam erti kata lain, kita mengambil kesempatan untuk menambah pahala dengan melakukan amalan sedekah.

Sedekah secara literalnya bermaksud ‘benar’. Dari segi syariat, sedekah adalah perbuatan memberi sesuatu yang bermanfaat daripada seseorang kepada orang lain secara sukarela dan ikhlas, dan ianya membuatkan penerima merasa bahagia. Sedekah tidak semestinya dalam bentuk wang ringgit atau berbentuk materialistik semata-mata tetapi ianya juga dalam bentuk lain seperti menolong orang lain dengan tenaga dan fikiran, mengajarkan ilmu, malah senyuman yang ikhlas juga adalah suatu sedekah.

Konsep sedekah dapat kita fahami daripada hadis Rasulullah SAW yang bermaksud:

“Senyummu kepada saudaramu ialah sedekah bagimu; kamu memerintah kepada kebaikan dan melarang kemungkaran ialah sedekah; kamu memberi petunjuk kepada seseorang sesat di jalan ialah sedekah; kamu melihat kepada seseorang yang tidak dapat melihat dan menolongnya, itu adalah sedekah bagimu; kamu menghilangkan batu, duri dan tulang di jalan ialah sedekah bagimu dan kamu memasukkan air daripada timbamu ke timba saudaramu sedekah bagimu.” (Hadis riwayat Tirmidzi).



Berdasarkan hadis di atas, dapat kita fahami bahawa betapa mudahnya kita mendapat merit pahala dengan mengamalkan sedekah. Sekecil-kecil kebaikan pun yang kita lakukan yang memberi manfaat kepada orang lain, ianya sudah dikira pahala sedekahnnya.

Jika dirungkaikan tentang kebaikan sedekah, tidak sedikit yang akan kita lihat. Sudah pasti, ganjaran pahala yang besar menanti sebagaimana firman Allah di dalam Surah al-Hadid, ayat ke-18 yang bermaksud,

“Sesungguhnya orang-orang lelaki yang bersedekah dan orang-orang perempuan yang bersedekah, serta mereka memberikan pinjaman kepada Allah, sebagai pinjaman yang baik (ikhlas), akan digandakan balasannya (dengan berganda-ganda banyaknya), dan mereka pula akan beroleh pahala yang mulia.”

Selain itu, amalan bersedekah juga akan menghapus dosa seperti mana sabda Rasulullah SAW yang bermaksud, **“Sedekah itu dapat menghapus dosa sebagaimana air itu memadamkan api”** (Hadis riwayat Tirmidzi). Malah, sedekah juga menjadi asbab murah rezeki dan dalam masa yang sama mendekatkan diri kepada Allah, kerana sifat ar-Rahman (pemurah) adalah antara sifatNya yang terpuji.

Sedekah pada hakikatnya menuntut kita untuk melakukannya dengan sepenuh ikhlas tanpa sekelumit perasaan riak atau bangga. Ikhlas itu ibarat semut hitam yang berjalan di atas batu hitam pada waktu malam. Harus kita sedar, tanpa keikhlasan, maka sifat riak yang akan menyelimuti amalan ini dan kesudahannya, sia-sialah amalan kita. Perkara ini telah dijelaskan di dalam Surah al-Baqarah, ayat ke-264:

Maksudnya : Wahai orang-orang yang beriman! Jangan rosakkan (pahala amal) sedekah kamu dengan perkataan membangkit-bangkit dan (kelakuan yang) menyakiti, seperti (rosaknya pahala amal sedekah) orang yang membelanjakan hartanya kerana hendak menunjuk-nunjuk kepada manusia (riak), dan ia pula tidak beriman kepada Allah dan hari akhirat. Maka bandingan orang itu ialah seperti batu licin yang ada tanah di atasnya, kemudian batu itu ditimpak hujan lebat, lalu ditinggalkannya bersih licin (tidak bertahan lagi). (Demikianlah juga halnya orang-orang yang kafir dan riak itu) mereka tidak akan mendapat sesuatu (pahala) pun dari apa yang mereka usahakan. Dan (ingatlah), Allah tidak akan memberi petunjuk kepada kaum yang kafir.

Justeru, sama-sama kita didik diri kita untuk sentiasa bersyukur dengan nikmat yang Allah berikan dengan mempraktikkan amalan bersedekah dengan apa cara sekalipun semampunya. Tanamkan juga dalam diri kita untuk sentiasa ikhlas dan jujur, bukan sahaja dalam bersedekah, malah dalam apa jua amalan seharian kita kerana hanya dengan keikhlasan sahaja menjadi asbab amalan kita dihitung Allah, bukannya sebanyak mana yang kita hulurkan. Dari sudut yang lain, bukalah mata hati kita dengan menginsafi hikmah yang Allah berikan ketika Dia menurunkan musibah ini. Bukanakah itu satu jalan yang terbentang luas dariNya untuk kita menambah pahala dan menebus dosa? Fikir-fikirkanlah! Wallahu'lam bissawab.

TRIVIA 1

8 Golongan (mustahik) yang berhak menerima zakat

- FAKIR
- MISKIN
- RIQAB (HAMBA SAHAYA)
- GHARIM ATAU GHARIMIN
- MUALAF
- FISABILILLAH
- IBNU SABIL
- AMIL

TRIVIA 2

Fakta tentang Quran

- Jumlah surah : 114
- Jumlah Juzu' : 30
- Jumlah ayat: 6666
- Surah Terpanjang : Surah al-Baqarah - 286 ayat
- Surah terpendek : Surah al-Kausar - 3 ayat



PENGORBANAN DALAM MENEMPUH UJIAN

Umat Islam diingatkan untuk menghayati ibrah di sebalik pensyariaatan ibadah korban. Peristiwa di mana Allah memerintahkan Nabi Ibrahim a.s. untuk mengorbankan anaknya, Nabi Ismail a.s. sarat dengan mesej serta iktibar. Kisah ini, turut memberi mesej dan peringatan yang penting kepada manusia bahawa jalan menuju kebahagiaan dan kesejahteraan hidup itu memerlukan pengorbanan. Betapa Allah subhanahu wata'ala meletakkan sifat berkorban sebagai sifat yang dipandang tinggi oleh-Nya dan sekaligus menjadi bukti kepatuhan dan ketaatan kepada Allah Tuhan sekalian alam.

Peringatan ini dikongsikan oleh Sahibul Fadhilah Dato' Haji Mustapha Kamal bin Haji Ahmad Fauzi, Imam Besar Masjid Negeri, di dalam Khutbah Aidiladha di Masjid Jamek Negeri Sarawak.

Beliau turut mengingatkan Jemaah bahawa peristiwa pengorbanan tersebut, mendidik kita untuk bersikap sabar dalam menghadapi apa jua ujian dan dugaan hidup dari Allah subhanahu wata'ala, lebih-lebih lagi pandemik COVID-19 yang kita hadapi sekarang ini.

Jangan mudah mengeluh dan hendaklah tetap menyerah dan bertawakal kepada Allah subhanahu wata'ala. Semuanya adalah ketentuan dan ketetapan daripada Allah subhanahu wata'ala. Firman Allah subhanahu wata'ala dalam surah Al-Baqarah ayat 156, yang bermaksud : "Iaitu orang-orang yang apabila ditimpa oleh sesuatu musibah, mereka berkata: Sesungguhnya kami adalah kepunyaan Allah dan kepada-Nya jualah kami kembali."

Pengajaran dari khutbah yang telah disampaikan ialah; pertama : Bertakwah dan lakukanlah ketaatan kepada Allah SWT dengan yakin agar terhakis perasaan curiga atau prasangka yang boleh membawa kepada kecuaian dan keingkaran terhadap perintah-Nya. Kedua : Peliharalah hubungan dengan Allah SWT melalui ketaatan dengan ikhlas. Ketiga : Pengorbanan atas urusan agama dan mengharapkan redha-Nya, tidak akan disia-siakan oleh Allah SWT. Keempat : Contohlah para nabi dan keluarga mereka yang beriman dalam meneruskan kehidupan di dalam ketaatan.



SAMBUTAN TAHUN BARU 1443H PERINGKAT NEGERI SARAWAK

Tuan Yang Terutama Yang Di-Pertua Negeri Sarawak menyertai Sambutan Tahun Baru Hijrah 1443H peringkat Negeri Sarawak yang berlangsung di Masjid Jamek Negeri Sarawak pada 9 Ogos bersamaan 30 Zulhijjah 1442H. Turut mengiringi TYT Yang Di-Pertua Negeri adalah Ketua Menteri Sarawak, Datuk Patinggi Abang Haji Abdul Rahman Zohari bin Tun Datuk Abang Haji Openg.

Majlis yang berlangsung dengan mematuhi prosedur operasi standard (SOP) ini, bermula seawal 6.30 petang, dimulakan dengan bacaan doa akhir tahun 1442H yang dipimpin oleh Sahibul Fadhilah Dato' Haji Mustapha Kamal bin Haji Ahmad Fauzi.

Beliau kemudiannya memimpin solat fardhu Maghrib, dan seterusnya mengetuai bacaan doa awal tahun 1443H, diikuti bacaan Surah Yaasin. Para jemaah seterusnya diperdengarkan dengan ceramah khas yang disampaikan oleh Sahibus Samahah Datu Haji Kipli bin Haji Yassin, Mufti Kerajaan Negeri Sarawak.

Hadir sama adalah Menteri Pelancongan, Kesenian dan Kebudayaan Sarawak, Datuk Haji Abdul Karim Rahman Hamzah, Menteri Muda di Jabatan Ketua Menteri (Hal Ehwal Islam dan DBKU) merangkap Menteri Muda Utiliti, Datuk Dr. Haji Abdul Rahman Junaidi, Yang Di-Pertua Majlis Islam Sarawak, Datu Haji Misnu bin Taha, serta beberapa pemimpin tinggi kerajaan negeri.

Menyambut ketibaan tetamu kehormat adalah Ketua Pegawai Eksekutif Lembaga Amanah Kebajikan Masjid Negeri Sarawak (LAKMNS), Datuk Haji Abang Abdul Wahap bin Haji Abang Julai, serta pegawai-pegawai kanan LAKMNS.

"MANHAJ RABBANI UMMAH BERKUALITI"

Sebuah ceramah khas sempena Sambutan Program Kerohanian Maal Hijrah 1443H/2021 anjuran Jabatan Pengurusan Masjid-masjid (JPMM), Lembaga Amanah Kebajikan Masjid Negeri Sarawak (LAKMNS) telah berlangsung di Masjid Bandaraya Kuching pada 10 Ogos 2021 bersamaan 2 Muharram 1443H.

Ceramah menampilkan Pengarah Jabatan Mufti Negeri Sarawak, al-Fadhil Ustaz Haji Mual bin Haji Suaud. Intipati ceramah yang disampaikan adalah berkisar tentang ibrah dan falsafah di sebalik peristiwa hijrah. Beliau turut mengingatkan jemaah untuk sentiasa membuat kebaikan dan sentiasa menimba ilmu sebagai cara untuk meningkatkan keyakinan kita kepada agama, di samping menghayati setiap ibadah yang dilakukan.

Turut sama dalam majlis ini adalah Ketua Pegawai Eksekutif LAKMNS, Datuk Haji Abang Abdul Wahap bin Haji Abang Julai, Ketua Pegawai JPMM LAKMNS, Encik Abang Bikusary bin Haji Kadir serta pegawai dan kakitangan LAKMNS.



Firman ALLAH SWT: "Sesungguhnya bilangan bulan di sisi ALLAH SWT adalah sebanyak 12 bulan sebagaimana yang terdapat di dalam kitabullah (Lauh al-Mahfuz) pada hari diciptakan langit-langit dan juga bumi. Di antaranya (bulan-bulan tersebut) adalah empat bulan haram. Demikian itulah agama yang lurus maka janganlah kalian menzalimi diri kalian di dalam bulan-bulan tersebut."
(Surah al-Taubah, ayat 36)



LAKMNS HULUR SUMBANGAN KE BEBERAPA LOKALITI PKPD DI SEKITAR PETRA JAYA, KUCHING

Lembaga Amanah Kebajikan Masjid Negeri Sarawak (LAKMNS) telah menyalurkan sumbangan kepada 3 buah kampung di sekitar kawasan Petra Jaya, Kuching susulan pelaksanaan Perintah Kawalan Pergerakan Diperketatkan (PKPD) baru-baru ini. Kampung-kampung yang terlibat adalah Kampung Bintawa Ulu dan Kampung Bintawa Tengah yang telah dilanjutkan tempoh PKPD, serta Kampung Goebilt. Sumbangan adalah berupa paket beras, telur, minyak masak, air kordial serta pelbagai jenis biskut.

Ketua Pegawai Jabatan Pengurusan Masjid-masjid (JPMM), Encik Abang Bikusary bin Haji Kadir yang mengetuai rombongan menyampaikan sumbangan kepada wakil-wakil penerima di kampung-kampung tersebut pada 25 dan 26 Ogos 2021.

LAKMNS berharap sumbangan yang dihulurkan ini dapat meringankan beban mereka yang terjejas pendapatan kerana tidak dapat keluar bekerja.



MAHABBAH: MENYEMAI KASIH SAYANG DALAM REDHA ALLAH

Mahabbah merupakan perkataan arab berakar daripada hubungan yang bermaksud kasih sayang atau kecintaan. Kasih sayang adalah suatu sifat yang sangat dianjurkan di dalam Islam sesuai dengan firman Allah di dalam Surah Maryam ayat ke-96 yang bermaksud

“Sesungguhnya orang-orang yang beriman dan beramal soleh, kelak Allah Yang Maha Pemurah akan menanamkan dalam (hati) mereka rasa kasih sayang.” Seruan ini turut dinukilkan di dalam Surah al-Balad ayat ke-17 yang bermaksud “Dan dia (tidak pula) termasuk orang-orang yang beriman dan saling berpesan untuk bersabar dan saling berpesan untuk berkasih sayang.”

Di dalam konteks ajaran Islam, kasih sayang yang dianjurkan adalah terhadap perkara yang membawa kepada kebahagiaan di dunia dan akhirat. Dalam erti kata lain, perasaan kasih sayang ini adalah bertitik tolak daripada keimanan kepada Allah serta menginsafi nikmat yang Allah kurniakan kepada hambaNya. Justeru, dapat kita fahami di manakah seharusnya kita tanamkan sifat kasih ini di mana ianya membawa kepada keredhaan Allah.

Seharusnya rasa cinta yang utama wajib kita miliki adalah cintakan Allah sebagai Tuhan yang Maha Pencipta. Wajib untuk kita beritiqad bahawa Allah adalah satu-satunya Tuhan yang selayaknya disembah. Atas sebab cinta, maka wajib untuk kita menuruti dan melaksanakan segala perintahNya dan menjahui segala laranganNya.

Sebagai Habibullah (kekasih Allah), maka Rasulullah adalah insan yang wajib untuk kita kasih dan taati sebagaimana perintah Allah di dalam beberapa ayat Quran, “taatilah Allah dan Rasul dan ulul amri”. Di dalam ayat lain, contohnya di dalam Surah al-Taubah ayat ke-24, Allah berfirman yang bermaksud

“Katakanlah: ‘jika bapa-bapa, anak-anak, saudara-saudara, isteri-isteri, kaum keluargamu, harta kekayaan yang kamu usahakan, perniagaan yang kamu khawatir kerugiannya, dan tempat tinggal yang kamu sukai, adalah lebih kamu cintai dari Allah dan Rasul-Nya dan dari berjihad di jalan-Nya, maka tunggulah sampai Allah mendatangkan keputusannya’. Dan Allah tidak memberi petunjuk kepada orang-orang yang fasik.”



Dalam hal ini, Rasullah SAW turut bersabda yang bermaksud,

“Demi Dzat yang jiwaku berada di Tangan-Nya, kalian tidak beriman hingga aku lebih dicintainya melebihi (cintanya) pada diri, harta, dan anaknya, serta seluruh manusia” (HR. Bukhari).

Dalil ini sudah cukup untuk menunjukkan bahawa mencintai Rasulullah SAW sangat dituntut. Mencintai Baginda bukanlah dengan ucapan semata-mata, malah ia melibatkan amalan sehari-hari kita, seperti mengamalkan sunnah Baginda, dan dalam masa yang sama mentaati segala ajaran Baginda.

Selain itu, sifat kasih sayang turut dianjurkan untuk sesama manusia. Sudah tentu, kasih sayang wajib kita curahkan kepada kedua ibu bapa serta keluarga kita. Sebagai tanda mahabbah ini, wajib kita mentaati ibu bapa serta sentiasa memuliakan mereka sepertimana firman Allah SWT dalam surah Al-Isra' ayat 23:

“Dan Tuhan Mu telah perintahkan supaya engkau tidak menyembah melainkan kepadanya semata-mata dan hendaklah engkau berbuat baik kepada ibu bapa. Jika salah seorang dari keduanya atau kedua-dua sekali sampai kepada umur tua dalam jagaan dan peliharaanmu maka janganlah engkau berkata kepada mereka sebarang perkataan kasar sekalipun perkataan “Ah” dan janganlah engkau menengking atau menyergah mereka tetapi katakanlah kepada mereka perkataan yang baik dan mulia (bersopan santun)”.

Seruan ini dengan jelas menunjukkan betapa Allah meletakkan orang tua (ibu bapa) pada kedudukan yang sangat tinggi sehingga mewajibkan kita untuk sentiasa berbuat baik kepada mereka.

Setelah itu, sifat kasih sayang ini seharusnya juga kita tunjukkan kepada sesama manusia. Allah berfirman di dalam Surah Ali-Imran ayat ke-103 yang bermaksud

“Dan berpegang teguhlah kamu sekalian dengan tali Allah dan janganlah kamu sekalian berpecah belah, dan ingatlah nikmat Allah atas kamu semua ketika kamu bermusuhan-musuhan maka Dia (Allah) menjinakkan antara hati-hati kamu maka kamu menjadi bersaudara sedangkan kamu diatas tepi jurang api neraka, maka Allah mendamaikan antara hati kamu.



Demikianlah Allah menjelaskan ayat ayatnya agar kamu mendapat petunjuk". Ayat ini sangat bertepatan dengan semangat kasih sayang di mana, berdasarkan ayat di atas, Allah menyatakan bahawa sekiranya manusia dalam keadaan bermusuhan, azab yang menunggu amatlah dasyat, iaitu siksaan api neraka. Na'uzubillahiminzalik. Sebagai kesimpulan, marilah sama-sama kita semaikan sifat kasih sayang sesama manusia, di samping menunjukkan cinta kita kepada Allah dan Rasul dengan cara mentaati segala seruan yang diberikan kepada kita, serta menjauhi larangan yang Allah tetapkan di dalam al-Quran. Semoga dengan sifat mahabbah ini kita dijauhi azab api neraka dan kehidupan kita sentiasa dalam keredhaan Allah.



PEDIHNYA AZAB NERAKA

Disediakan oleh : Heiruzam Filani, Pembantu Tadbir

Allah SWT berfirman dalam Surah Al-'Alaq, ayat 16-17 yang bermaksud: "Kemudian biarlah ia memanggil kumpulannya (untuk menyelamatkannya). Kami pula akan memanggil malaikat Zabaniyah (untuk menyeksanya)!"

Umat Islam wajib percaya pada syurga dan neraka. Ia perkara ghaib yang menjadi milik Allah. Namun ada beberapa doa yang harus umat Islam tahu untuk mengelak seksa neraka selain mengerjakan amal kebaikan dan beramal soleh.

Salah satunya adalah berkaitan doa berbunyi

"Allahumma ajirni minan naar"

yang perlu dibaca tujuh kali selepas solat Subuh dan Maghrib di mana sesiapa yang membacanya dan jika dia meninggal pada hari itu maka terlepas dari neraka.

“

Apabila dia meletakkan kakinya di atas selipar itu, maka akan terbakar dan menggelegak otaknya.

Setiap orang beriman pasti akan bimbang dan sangat takut dengan dosa-dosa yang telah mereka lakukan sekiranya tidak diampunkan oleh Allah SWT.

Dengan sisa-sia usia yang masih berbaki ini, adalah lebih baik sekiranya kita mempersiapkan diri dengan melakukan setiap amalan ahli syurga.

Allah SWT berfirman yang bermaksud: “Wahai orang-orang yang beriman! Peliharalah diri kamu dan keluarga kamu daripada neraka yang bahan-bahan bakarannya: manusia dan batu (berhala), neraka itu dijaga dan dikawal oleh malaikat-malaikat yang keras kasar (layanannya), mereka tidak menderhaka kepada Allah dalam segala yang diperintahkan-Nya kepada mereka, dan mereka pula tetap melakukan segala yang diperintahkan.” (Surah At-Tahriim, ayat 6)

Penghuni neraka, tidak akan mati ketika menerima azab siksaan neraka walaupun tubuh mereka hancur, dibakar, dicincang, dipotong atau dirosakkan.

Dalam Surah Al-Furqan, ayat 65-66 yang bermaksud: Dan juga mereka yang berdoa dengan berkata: “Wahai Tuhan kami, sisihkanlah azab neraka jahanam daripada kami, sesungguhnya azab seksanya itu adalah menggerikan. Sesungguhnya neraka jahanam itu tempat penetapan dan tempat tinggal yang amat buruk.”

Nabi Muhammad SAW pernah bercerita mengenai kedalaman api neraka.

Daripada Abu Hurairah r.a, beliau berkata, “Kami pernah bersama Nabi SAW, tiba-tiba beliau mendengar seperti suara benda jatuh ke dasar.

“Nabi SAW bertanya, ‘Tahukah kalian suara apa itu?’ Kami menjawab, ‘Allah dan Rasul-Nya lebih mengetahui.’”

Baginda bersabda yang bermaksud: ‘Ini adalah batu yang dilemparkan ke neraka sejak 70 tahun yang lalu dan sekarang baru sampai ke dasarnya.’ (Hadis riwayat Muslim)

Hadis ini jelas menunjukkan saiz neraka sangat besar dan dalam.

Golongan yang mendapat seksaan yang paling ringan di dalam api neraka adalah seorang lelaki yang diberi pakai kasut atau selipar daripada api neraka.

Apabila dia meletakkan kakinya di atas selipar itu, maka akan terbakar dan menggelegak otaknya.

Marilah kita semua memanjatkan doa dengan penuh pengharapan supaya Allah SWT selamatkan diri dan ahli keluarga kita daripada menjadi bakaran api neraka.

SHEIKH HAJI OTHMAN BIN ABDUL WAHAB: ULAMA' TEMPATAN UNGGUL

Disediakan oleh: Mohamad Hanif bin Abudullah, Pegawai Penerbitan, Bahagian Publisiti dan Komunikasi, LAKMNS



Sheikh Haji Othman Abdul Wahab al-Sarawaqi atau Sheikh Othman Sarawak bukanlah nama yang asing di kalangan umat Islam terutamanya di Sarawak. Beliau dikenali sebagai seorang ulama' besar kelahiran Sarawak yang banyak menyumbang kepada penyebaran dakwah islamiah. Namun, siapakah susuk tubuh yang namanya diabadikan sebagai nama sebuah sekolah menengah agama di Kuching, SMK(A) Sheikh Haji Othman Abdul Wahab atau singkatannya SMK(A) SHOAW.

Beliau lahir di Kampung Sinjan, Sarawak pada tanggal 10 Muharram 1281 Hijriyah/15 Jun 1863 Masihi. Asal usul keturunan beliau jika disusun adalah golongan kaum bangsawan di Jawa. Ini adalah berdasarkan susur galur nasabnya iaitu Sheikh Haji Othman bin Abdul Wahab bin Ahmad bin Abdullah bin Petinggi Amir bin Datuk Akbar bin Datuk Qaim bin Datu Patinggi Betung bin Bandar Tanduk bin Petinggi Kantum bin Patih Malang bin Patih Mengadi bin Merpati Jipang.

Sheikh Othman mula menuntut ilmu di Mekah pada tahun 1299 Hijrah/1881 Masihi. Di Mekah, beliau telah berguru dengan beberapa ulama' di sana, di antaranya ialah Sheikh Muhammad bin Sulaiman Hasbullah Al-Makki, Sheikh Mustofa bin Muhammad Al-'Afifi, Sheikh Abdul Karim Daghistani, Sheikh Umar Ba Junaid dan ramai lagi. Guru-guru beliau di Madinah pula ialah Sayyid Falih bin Muhammad Az-Zahiri, Sayiid Muhammad Ali bin Zahir Al-Witri dan Sayyid Muhammad Amin bin Ahmad Ridhwan.



Bangunan Lama SMKA Sheikh Haji Othman Abdul Wahab



Bangunan Lama SMKA Sheikh Haji Othman Abdul Wahab

Semasa di Mekah Al-Mukarromah, beliau turut berguru dengan ulama'-ulama' terkenal yang berasal dari kepulauan Melayu, di antaranya Sheikh Abdul Karim Al-Bantani, Sheikh Muhammad Zainuddin Al-Badawi Al-Sumbawi, Sheikh Ahmad bin Muhammad Yunus Lingga, Sheikh Ahmad Al-Fathani dan ramai lagi.

Ketokohan ilmu beliau bukan sahaja mendapat sambutan di kalangan penduduk tempatan, beliau malah mendapat pengiktirafan daripada dunia luar. Sebagai contoh, seorang ulama' terkenal di Indonesia, Prof. Dr. Haji Abdul Malik Karim Amrullah, yang lebih dikenali sebagai Buya Hamka, pernah dalam satu syarahan telah menzahirkan betapa penduduk Sarawak sebagai orang yang 'alim serta berilmu tinggi.

Sanjungan tinggi ini antaranya adalah sebagai pengiktirafan kepada Sheikh Othman sebagai salah seorang guru kepada bapanya iaitu Haji Rasul atau Haji Karim Amrullah. Fakta ini tercoret di dalam salah sebuah buku tulisan Hamka iaitu Ayahku yang dikarang pada tahun 1950.

Sebagai seorang tokoh ilmu yang berwibawa, terdapat beberapa perkara yang harus kita contohi beliau terutamanya dalam menuntut ilmu. Beliau dikatakan mempunyai rutin harian yang sangat menitikberatkan pelaksanaan sunnah Rasulullah SAW. Kesungguhan beliau mengamalkan sunnah adalah sebagai tanda cintanya kepada Baginda SAW.

Selain itu, beliau juga dikenali sebagai seorang yang sangat menjaga adabnya terhadap ilmu dan gurunya. Ketika menyampaikan ilmu, beliau sangat berwaspada bagi mengelakkan daripada menyampaikan ketidakbenaran kepada para muridnya.

Walaupun beliau telah ditauliahkan sebagai seorang guru, beliau tetap merendah diri dan tidak sombang dengan ilmu yang ada. Beliau sentiasa menunjukkan rasa hormat dan sentiasa meraikan para penuntut ilmu, kerana baginya, seseorang yang benar-benar ikhlas menuntut ilmu, maka Allah akan memuliakan dan meninggikan martabatnya.

Sebagai umat Islam, seharusnya kita menjadikan Sheikh Othman Abdul Wahab sebagai contoh dan teladan yang baik dalam usaha kita menuntut ilmu, lebih-lebih lagi melihat kesungguhan beliau menuntut ilmu sehingga ke Mekah dan Madinah. Kesungguhan beliau dalam menjadikan sunnah Baginda sebagai rutin harian seharusnya dijadikan pedoman supaya kita sentiasa dalam keredhaan Allah.

فتح الرضوان

في مناقب الشیخ عمران

NAFAHĀT AL-RIDWĀN

RIWAYAT HIDUP SHAYKH UTHMĀN SARAWĀQI



SHAYKH MUHAMMAD ZAYN AL-DIN BIN
SHAYKH UTHMĀN AL-SARAWĀQI

Transliterasi, Suntingan & Pengenalan Oleh:
FAZRIL SALEH



JENAZAH

dimandikan oleh para malaikat.

Dalam perang Uhud, Hanzhalah berjaya menjatuhkan kuda Abu Sufyan bin Harb, namun kaum musyrikin berusaha untuk melindungi Abu Sufyan termasuklah Al-Aswad bin Syaddad yang berjaya menghalang Hanzhalah lalu menembak Hanzhalah.

Tidak berputus asa, Hanzhalah berjalan dalam keadaan parah ke arah Al-Aswad untuk menyerang, namun Hanzhalah ditumbak buat kali kedua sehingga dia wafat.

Jenazah Hanzhalah dimuliakan oleh para malaikat. Kata Rasulullah, "Sesungguhnya aku melihat malaikat memandikan Hanzhalah di antara langit dan bumi dengan air hujan beralaskan perak. Tanyalah kepada isterinya ada apa dengannya?"

Kemudian, para sahabat ketemu isteri Hanzhalah dan dia mengatakan: "Hanzhalah pergi dalam keadaan junub. Dia langsung bergegas pergi ketika mendengar suara seruan perang." Rasulullah berkata: "Itulah sebabnya mengapa dia dimandikan oleh malaikat."

Secara tidak langsung, ia menunjukkan kecintaan Hanzhalah kepada Islam, sedangkan dia baru saja berkahwin dan melakukan hubungan suami isteri, namun kerana tergesa-gesa dalam menyahut seruan perang, Hanzhalah sendiri tidak sempat untuk menuaikan mandi wajib.

Hanzhalah telah bernikah dengan Jamilah binti Abdullah bin Ubay dan mereka menjalani malam pengantin pada malam menjelang perang Uhud tersebut. Hanzhalah meminta izin untuk tidur bersama isterinya pada malam itu, lalu Baginda memberi keizinan.

Setelah solat Subuh, Hanzhalah ingin menemui Rasulullah tetapi Jamilah mendekatinya sehingga mereka melakukan hubungan suami isteri lagi. Disebabkan tergesa-gesa, Hanzhalah pergi berperang dalam keadaan junub.

Rujukan : Kitab Sirah Nabawiyyah (Dr Ali Muhammad As-Shallabi)

Gambar Hiasan

"Hai orang-orang yang beriman, penuhilah seruan Allah dan seruan Rasul apabila Rasul menyeru kamu kepada suatu yang memberi kehidupan kepada kamu

Surah Al-Anfal:24



HAMZAH BIN ABDUL MUTTALIB

SINGA ALLAH

Hamzah bin Abdul Muttalib diperkirakan lahir pada waktu hampir sama dengan Nabi Muhammad S.A.W. Beliau merupakan anak kepada pasangan Abdul Muttalib dan Haulah binti Wuhaib berketurunan Bani Zuhrah.

Hamzah juga merupakan ayah saudara kepada Nabi Muhammad S.A.W, dan juga merupakan adik-beradik susuan dengan Nabi Muhammad S.A.W, ini kerana Hamzah dan Nabi Muhammad pernah disusukan oleh Thuwaibah hamba perempuan Abu Lahab sewaktu mereka berdua masih bayi.

Menurut riwayat, pernikahan Abdul Muttalib bersama Haulah dan Abdullah bin Abdul Muttalib bersama Aminah binti Wahb terjadi sama waktunya. Diriwayatkan juga ibu Nabi, Aminah binti Wahab, adalah sepupu kepada Haulah binti Wuhaib.

Hamzah mempunyai tubuh yang tegap dan suka memakai bulu burung di topi kepalanya. Hamzah akhirnya telah memeluk Islam.

Hamzah terlibat dalam dua perperangan iaitu Perang Badar dan Perang Uhud. Ketika perperangan di Badar, Hamzah berjaya membunuh dua orang bangsawan Quraisy iaitu Utbah dan Shaibah.

Walaupun Hamzah merupakan bapa saudara kepada Nabi SAW, umur mereka boleh dikatakan sebaya. Mereka membesar bersama dan menyusu dari ibu susuan yang sama. Nabi SAW amat kasih kepada teman sepermainannya itu sejak kecil lagi.

Walaubagaimanapun, Hamzah tidak menerima dakwah Nabi SAW daripada awal. Bukan kerana benci, tetapi tidak mahu mempedulikan hal-hal rumit sedemikian. Beliau lebih suka menghabiskan masa dengan minatnya memburu. Walaupun tahu apa yang berlaku, beliau langsung tidak mengendahkan seruan Nabi untuk beriman dan bersama Islam.

Sehingga pada suatu hari, ketika beliau pulang dari memburu, datang seorang lelaki mengadu tentang apa yang telah dilakukan oleh Abu Jahal terhadap anak saudaranya Muhammad SAW. Hamzah bertanya adakah ada lagi orang lain melakukan perkara sama? Jawab lelaki itu, ya, bahkan ramai.

Hamzah menjadi marah tiba-tiba. Beliau terus meluru ke Safa, tempat biasa Abu Jahal berkumpul bersama konco-konconya. Tanpa apa-apa mukaddimah, beliau terus menerpa ke arah Abu Jahal dan menghentak kepala Abu Jahal dengan busur yang ada di tangannya, menyebabkan

Disediakan oleh : Heiruzam Filani, Pembantu Tadbir

Gambar Hiasan

kepala Abu Jahal koyak dan berdarah. Hamzah kemudian melaungkan: "Hari ini aku umumkan bahawa aku telah memeluk Islam! Kalau ada sesiapa berani membuat aku kembali berpaling dari Islam, cubalah!"

Namun tiada siapapun yang berani menyentuh Hamzah.

Dalam masa yang pantas, tersebarlah berita keislaman Hamzah ke seluruh kota Mekah. Ia menjadi tumparan hebat dan malapetaka besar buat orang musyrikin. Adapun bagi orang Islam, ia adalah satu rahmat yang cukup besar. Bagi mereka, tiadalah hari-hari yang lebih menggembirakan ketika di Mekah melainkan dua hari; hari Islamnya Umar al-Khattab dan hari Islamnya Hamzah bin Abdul Muttalib.

Pada waktu peperangan di Uhud, Hamzah terkorban syahid akibat rejaman lembing yang dilemparkan oleh Wahsyi, seorang hamba berkulit hitam. Beliau digelar Nabi sebagai penghulu para syuhada.



SIAPA WANITA SOLEHAH?



Gambar Hiasan

Wanita hiasan dunia, seindah hiasan adalah wanita solehah, yang akan membagiakan syurga di dalam rumah tangga. Begitulah bait-bait lirik nasyid daripada kumpulan Inteam yang menyeru sekali gus mempalitkan nasihat dan dakwah mengenai sebaik-baik hiasan di dunia adalah wanita solehah.

Hadis yang diriwayatkan daripada Abdullah bin 'Amr RA, Nabi SAW pernah bersabda yang bermaksud: "Dunia adalah perhiasan dan sebaik-baik perhiasan dunia adalah wanita solehah." (Riwayat Muslim, No 715)

Wanita solehah adalah seorang yang bertakwa dengan melakukan apa yang disuruh oleh Allah SWT dan meninggalkan apa yang dilarang. Menutup aurat mengikut syarak adalah salah satu suruhan Allah SWT kepada semua Muslimah.

Sabda Nabi SAW bermaksud: "Hendaklah kamu aku beritahukan tentang sebaik-baik harta seorang lelaki adalah wanita yang solehah.

Apabila dia melihat kepadanya, dia akan menggembirakan, apabila dia memberi arahan kepadanya wanita itu taat dan apabila dia tidak berada di sisinya, wanita itu menjaga maruah dirinya." (Riwayat Abu Daud, No 1664)

Hukum menutup aurat bagi perempuan yang baligh dan berakal adalah wajib. Mendapatkan keredaan Allah SWT adalah tujuan utama hidup. Hikmah terbesar mematuhi hukum Allah adalah terhindar dan selamat daripada azab api neraka. Dengan menutup aurat juga akan mengangkat maruah, memelihara kehormatan dan ia lambang kemuliaan seseorang Muslimah itu. Ia juga mampu menghindarkan diri dan masyarakat terjebak dengan segala kemaksiatan dan mengelakkan daripada timbulnya fitnah.

Allah berfirman yang bermaksud: “**Wahai anak-anak Adam! Sesungguhnya Kami telah menyediakan pakaian untuk menutupi auratmu dan sebagai perhiasan bagimu. Tetapi pakaian takwa, itulah sebaik-baik pakaian. Demikianlah sebahagian tandanya kekuasaan Allah, mudah-mudahan mereka beringat.**” (Surah Al-A'raf ayat 26).

Daripada ayat ini jelas Allah mengingatkan kepada kita bahawa sebaik-baik perhiasan atau sebaik-baik pakaian adalah pakaian takwa.

Allah berfirman dalam kitab-Nya mengenai adab dan syariat berpakaian dalam Islam. Islam sangat mengangkat darjat seorang wanita Islam dan sangat menitikberatkan ketinggian akhlak seseorang wanita itu dengan menjaga auratnya.

Daripada Tafsir Ibnu Kathir, Allah SWT memerintahkan Rasul-Nya agar menyuruh isteri-isteri, anak-anak perempuan baginda dan umumnya perempuan beriman agar mereka menutup aurat ke seluruh tubuh sehingga dapat dibezaikan dengan perempuan jahiliyah dan hamba perempuan. Ini kerana, dahulu kebiasaan orang fasiq di kota Madinah suka keluar pada waktu malam ketika hari mulai gelap, menuju ke jalan-jalan di kota Madinah dengan niat melihat-lihat perempuan. Kerana ketika waktu malam tiba, kebiasaan perempuan itu keluar menuju ke jalan-jalan untuk melepaskan hajat (buang air). Lelaki fasiq itu mempunyai keinginan buruk pada perempuan. Apabila mereka melihat perempuan berjilbab maka mereka berkata: “Ini perempuan terhormat, tahanlah diri kamu.” Tetapi apabila mereka melihat perempuan tidak berjilbab, maka mereka berkata, “Ini hamba perempuan.” Maka mereka segera menghampirinya.

Mujahid mengatakan, perempuan berjilbab dapat dipastikan mereka adalah perempuan terhormat sehingga lelaki yang fasik (jahat) tidak akan berani mengganggunya dan berkelakuan mencurigakan terhadapnya. (Ibnu Kathir, Tafsirul Quran 'Azimi, Jilid 11 1421 H/2000 M: 242-243)

Daripada Aisyah RA dia berkata, bahawa Asma binti Abu Bakar R.A masuk menemui Rasulullah SAW dengan memakai kain yang jarang, maka Rasulullah SAW memalingkan muka daripadanya. Baginda bersabda: “Wahai Asma, sesungguhnya seorang wanita jika telah baligh tidak boleh terlihat daripadanya kecuali ini dan ini. Baginda menunjuk wajah dan kedua telapak tangannya.” (Hadis Riwayat Abu Daud, Sunan Abi Daud, Juz 4, No Hadis 4104)

Wahai wanita, tutuplah auratmu dengan pakaian takwa kerana dirimu begitu berharga sehingga Allah perintahkan untuk menutupi keindahan diri daripada sebarang pandangan. Bersederhanalah dalam memilih pakaian, rasa malu sebagai perhiasan, menjaga pandangan, menjaga lisan, menjaga kehormatan diri, takut berbuat dosa, menangis kerana Allah dan selalu panjatkan kesyukuran kepada Allah SWT kerana wanita solehah adalah penghuni yang akan menjadi dambaan syurga.

WANITA YANG DICEMBURUI PARA BIDADARI SYURGA IAITU KHADIJAH, FATIMAH, AISYAH, MARYAM DAN ASIAH.

CONTOHI KEIKHLASAN DARIPADA AISYAH.

BELAJAR KESUCIAN DARIPADA MARYAM.

PELAJARI KETABAHAN DARIPADA FATIMAH.

TELADANI KESETIAAN DARIPADA KHADIJAH.

AMBIL PENGAJARAN KESABARAN DARIPADA ASIAH.

ASAS ILMU FIQH

Disediakan oleh: Mohamad Hanif bin Abudullah, Pegawai Penetapan Bahagian Publisiti dan Komunikasi, LAKMNS

Dari segi bahasa kalimah Fiqh bermaksud memahami. Pada asalnya ia bermaksud memahami agama secara keseluruhannya. Namun kemudiannya dikhususkan ulamak kepada memahami ajaran Islam yang berkaitan dengan hukum-hakam amali sahaja, iaitu percakapan, perbuatan dan hal-ehwal luaran manusia tanpa menyentuh soal aqidah dan akhlak.

1. Para ulamak membahagikan hukum-hakam Syarak kepada tiga iaitu;
 - a) Hukum-hakam I'tiqad
 - b) Hukum-hakam 'Amali
 - c) Hukum-hakam akhlak.
 Medan pengajian ilmu Fiqh ialah yang kedua di atas iaitu hukum-hakam amali. Ilmu Fiqh tidak menyentuh tentang hukum-hakam I'tiqad, begitu juga tidak menyentuh tentang akhlak.
2. Perkataan Syarak bermaksud Allah dan Rasul. Dalil-dalil Syarak pada dasarnya ialah Kitab Allah (yakni al-Quran) dan Sunnah RasulNya. Namun secara terperinci ia merangkumi juga Ijmak, Qiyas dan sebagainya.

Secara lebih jelas, ilmu Fiqh ditakrifkan oleh ulamak sebagai; “Ilmu berkenaan hukum-hakam Syarak yang bersifat ‘amali yang diperolehi dari dalil-dalilnya secara terperinci”.

APAKAH TUJUAN MEMPELAJARI ILMU FIQH?

Tujuan mempelajari ilmu Fiqh ialah untuk mengetahui hukum-hakam Syara' mengenai setiap tingkah laku manusia dan melaksanakan hukum-hakam tersebut dalam kehidupan dalam segenap ruang dan lapisannya.

Ilmu Fiqh amat berguna sama ada kepada ulama', mufti, qadhi maupun orang awam biasa. Bagi para ulama, mufti dan qadhi, mereka perlu mendalami ilmu ini untuk mengajar orang ramai tentang hukum Syara', memberi fatwa dan memutuskan hukuman terhadap sesuatu kes.

Adapun orang awam, mereka perlu mengetahui ilmu ini agar dapat menjalani kehidupan sehari-hari bertepatan dengan garis panduan yang ditetapkan Syara'.

APA MAKSUD HUKUM SYARAK?

Kita sebutkan tadi bahawa tujuan mempelajari ilmu Fiqh ialah untuk mengetahui hukum Syara' atas setiap perbuatan kita. Apa yang dimaksudkan dengan hukum Syara'? Hukum Syara' ialah "Ketetapan dari Allah ke atas perbuatan-perbuatan hamba yang mukallaf sama ada ia perlu dilakukan atau perlu ditinggalkan atau diberi pilihan untuk melakukannya atau meninggalkannya". Ketetapan ini diketahui berdasarkan penelitian terhadap dalil-dalil Syara' iaitu al-Quran, as-Sunnah, Ijma', Qias dan sebagainya oleh para ahli Fiqh atau Mujtahid.

BERAPAKAH PEMBAHAGIAN HUKUM SYARAK?

Melihat kepada pengertian hukum di atas, dapat kita simpulkan bahawa perbuatan-perbuatan hamba mengikut hukum Syarak berada dalam tiga bahagian besar;

Pertama; Perbuatan-perbuatan yang dituntut supaya dilakukan

Kedua; Perbuatan-perbuatan yang dituntut supaya ditinggalkan

Ketiga; Perbuatan-perbuatan yang diberi pilihan (yakni terserah kepada manusia sama ada ingin melakukannya atau meninggalkannya)

Kemudian, bahagian pertama dan kedua terbahagi pula kepada dua jenis;

Pertama; Yang dituntut secara jazam iaitu tuntutan mesti.

Kedua; Yang dituntut tidak secara jazam, iaitu tuntutan secara galakan sahaja, bukan tuntutan mesti atau wajib.

Bagi bahagian pertama (iaitu perbuatan-perbuatan yang dituntut supaya dilakukan), jika jenis tuntutan adalah jazam (yakni mesti), maka ia dinamakan wajib. Adapun jika jenis tuntutan adalah tidak jazam (tidak mesti), iaitu hanya galakan sahaja, maka ia dinamakan sunat. Bagi bahagian kedua pula (iaitu perbuatan-perbuatan yang dituntut supaya ditinggalkan), jika jenis tuntutan adalah jazam (yakni mesti), maka ia dinamakan haram. Adapun jika jenis tuntutan adalah tidak jazam (tidak mesti), iaitu hanya galakan sahaja, maka ia dinamakan makruh.

KESIMPULAN

Setelah memahami pengertian dan pembahagian hukum Syarak di atas, dapat kita simpulkan perbuatan-perbuatan mukallaf mengikut hukum Syarak terbahagi kepada lima jenis;

1. Yang wajib; iaitu perbuatan-perbuatan atau amalan-amalan yang mesti dilakukan di mana jika ditinggalkan akan berdosa.
2. Yang sunat; iaitu perbuatan-perbuatan atau amalan-amalan yang digalakkan melakukannya oleh Syarak iaitu diberi pahala sesiapa yang melakukannya, namun tidaklah berdosa jika ditinggalkannya.
3. Yang haram; iaitu amalan-amalan atau perbuatan-perbuatan yang mesti ditinggalkan di mana jika dilakukan akan berdosa.
4. Yang makruh; iaitu amalan-amalan atau perbuatan-perbuatan yang digalakkan meninggalkannya iaitu diberi pahala kepada orang yang meninggalkannya (kerana Allah), namun tidak dikira berdosa jika dilakukannya.

5. Yang mubah (harus); iaitu perbuatan-perbuatan atau amalan-amalan yang diserah kepada pilihan manusia samaada ingin melakukannya atau meninggalkannya di mana sebarang pilihannya tidak akan membawa implikasi dosa atau pahala.

Tidak ada perbuatan mukallaf dari sekecil-kecil hingga sebesar-besarnya melainkan tertakluk dengan salah satudari hukum lima di atas.

APA MAKNA MUKALLAF? SIAPAKAH YANG DIKATAKAN SEBAGAI MUKALLAF?

Mukallaf ialah seorang yang telah mencukupi syarat untuk diberikan taklif Syarak (yakni tuntutan dan kewajipan Syarak). Orang yang mukallaf wajib mematuhi ketetapan agama dan setiap perbuatan dan perlakuannya tertakluk dengan hukum yang telah ditetapkan oleh agama sama ada wajib, haram, harus dan sebagainya tadi. Syarat-syarat mukallaf ialah:

1. Telah sampai umur (yakni baligh)
2. Memiliki akal yang waras
3. Sampai dakwah kepadanya
4. Sempurna pancaindera, khususnya penglihatan atau pendengaran.

BELIA & ISLAM

Menerusi artikel ini, kita akan kongsikan kisah dalam al-Quran menunjukkan bagaimana sepatutnya generasi muda atau belia memainkan peranan seperti dikehendaki dalam Islam.

Sempena ulang tahun kemerdekaan negara yang ke 64, golongan muda atau belia seharusnya memperkuuhkan jati diri dalam usaha menentukan hala tuju negara dan ia seharusnya berpandukan kepada ajaran Islam dan al-Quran sebagai panduannya.

Kisah mengenai golongan belia turut diceritakan dalam al-Quran seperti berikut:

Dalam surah al-Kahfi ayat 13, Allah menceritakan tentang pemuda Al-Kahfi bagaimana mereka terpaksa menyembunyikan diri mereka ke dalam gua Al-Kahfi kerana nak menyelamatkan akidah dari dipaksa oleh Raja Diqyanus yang menyembah berhala dan akan membunuh sesiapa sahaja yang tidak menyembah berhala.

Tetapi pemuda Al-Kahfi ini tetap beriman kepada Allah sahaja dan tidak menyembah selain dari Allah walaupun mereka tahu mereka akan dibunuhi jika mengengkari perintah raja.

Akhirnya Allah selamatkan mereka dengan menidurkan mereka di dalam gua Al-Kahfi selama 309 tahun.

Dalam surah Yusuf pula bagaimana Allah menceritakan tentang Nabi Yusuf AS yang ditawarkan dengan syahwat, kenikmatan seksualiti tetapi baginda menolaknya dan akhirnya memilih untuk dipenjarakan daripada melakukan perzinaan dengan isteri raja.

Menerusi surah Assaffat ayat 102, diceritakan tentang Nabi Ibrahim dan Nabi Ismail AS di mana Allah mengujinya supaya menyembelih anaknya sendiri Nabi Ismail AS. Apa kata anak muda Nabi Ismail AS; "Wahai ayah, lakukanlah apa yang diperintahkan kepadamu. Insya Allah, ayah akan mendapat daku dari kalangan orang-orang yang sabar." Begitu taat seorang anak muda dengan perintah Allah sebagai ujian dan Allah menggantikan Nabi Ismail AS dengan kibas sebagai sembelihan.

Pada masa Islam mula disebarluaskan dalam kalangan orang Arab oleh baginda Nabi SAW maka kaum pemudalah yang awal dan paling ramai menerima ajaran Islam seperti Abu Bakar RA ketika berumur 38 tahun, Saidina Umar RA berusia 28 tahun, Saidina Ali RA berumur kurang 10 tahun dan sahabat lain yang umurnya antara 12 hingga 15 tahun.



Gambar Hiasan

Apa peranan generasi muda? Mengikut Dr Yusuf Qardhawi, bekas Ketua Ulama Dunia, generasi muda mempunyai empat kewajipan iaitu:

WAJIB MEMAHAMI ISLAM SECARA SAHIH

Mereka hendaklah mempelajari ilmu agama Islam terutama fardu ain terlebih dahulu sebelum mempelajari ilmu fardu kifayah yang lain.

Akidah hendaklah diteguhkan dahulu sebab tu Nabi SAW berdakwah di Mekah selama 13 tahun untuk menguatkan akidah atas umat Islam. Ayat-ayat al-Quran yang diwahyukan kebanyakannya berkisar tentang akidah seperti dalam rukun iman.

Apabila akidahnya kuat dan teguh baharulah mereka mampu melaksanakan amalan-amalan lain dan mampu mengharungi cabaran yang amat dahsyat. Tambahan lagi cabaran kita di akhir zaman ini amat dahsyat sekali dengan hiburan yang melampaui batasan, pergaularan



tanpa batasan, soal halal haram, pemikiran yang rosak dengan ideologi baru seperti liberal dan syiah, pendidikan yang jauh terpisah dari agama Islam dan sebagainya.

PERLU BERAMAL DENGAN ISLAM

Maksudnya menjadikan Islam sebagai cara hidup. Hidup dalam batasan yang Allah telah gariskan tentang halal, haram, makruh, sunat dan harus.

Tetapi kalau kita tengok realiti generasi muda, contohnya dalam laporan daripada Jabatan Pendaftaran Negara, lebih 532,158 kelahiran anak luar nikah yang didaftarkan dari 2005 hingga 2015 dengan 536 kes pembuangan bayi. Pada tahun 2017, hampir 5,000 bayi dilahirkan oleh remaja yang berumur bawah 18 tahun dan 120 kes pembuangan bayi.

Ia tidak lagi termasuk jumlah pasangan yang melakukan zina tetapi si wanita tidak hamil dengan melakukan pelbagai cara selain ada juga menggugurkan anak.

WAJIB MELAKSANAKAN DAKWAH KEPADA ISLAM

Maksudnya mereka hendaklah mengajak kepada Islam agama yang benar dan sempurna.

Mengamalkan Islam tidak cukup dengan amalan untuk diri sendiri sahaja bahkan hendaklah kebaikan itu disebarluaskan kepada manusia lain supaya orang lain turut sama mendapat kebaikan atau yang kita sebut sebagai rahmat.

Dalam surah al-Asr, Allah mensyaratkan kejayaan manusia dari kerugian agar berpesan kepada orang lain dengan kebenaran dan menerima pesanan daripadanya.

Dalam surah Luqman ayat 17 pula bermaksud; Bagaimana Luqman al-Hakim berpesan kepada anaknya; Wahai anak kesayanganku, dirikanlah solat dan suruhlah berbuat kebaikan serta larangkanlah daripada melakukan perbuatan mungkar dan bersabarlah atas segala bala bencana yang menimpamu.

Sesungguhnya yang demikian itu adalah dari perkara-perkara yang dikehendaki diambil berat melakukannya.”

MENGIKAT HUBUNGAN BERDASARKAN ISLAM

Sesungguhnya generasi muda yang mempersiapkan diri mereka untuk memahami Islam dengan kefahaman yang sahih, mengimannya dengan iman yang benar dan mendalam, berpesan-pesan dengannya dan menyeru kepadaannya, sepatutnya mereka saling tolong-menolong di antara mereka dan mengikat tali perhubungan di kalangan mereka. Maka tidak ada sesuatu amalan dalam Islam dalam bentuk perseorangan, amalan persendirian tidak mencukupi.

Ia mesti dilakukan dengan cara berjemaah, berpersatuan, kelompok kumpulan sebahagian kita dengan sebahagian yang lain sebagai ikatan persaudaraan.

Perlu ada sifat berkasih sayang kerana Allah, saling menziarahi kerana Allah, berkumpul kerana Allah, berkorban dan saling memahami dan memberi pemahaman dalam masalah yang dikongsi bersama, melakukan solat berjamaah, menyuruh kebaikan bersama, mencegah kemungkaran bersama dan sebagainya.

Oleh itu, menjadi tanggungjawab kita walau siapa pun kita sama ada sebagai ibu bapa, guru, jiran, pentadbir, dan selainnya untuk mendidik anak-anak dan masyarakat kita supaya memenuhi tanggungjawab mereka sebagai generasi muda yang akan meneraju negara pada masa akan datang.

Bagaimana akan jadi kepada negara kita akan datang, lihat generasi muda sekarang. Wallahu'lam.

Setiap muslim telah maklum bahawa Zulhijjah merupakan bulan untuk merealisasikan rukun Islam yang ke-5 iaitu mengerjakan ibadah haji bagi yang berkemampuan dari segi harta dan kesihatan. Juga sinonimnya, bulan Zulhijjah dikaitkan dengan peristiwa pengorbanan Nabi Ibrahim AS yang menyembelih anaknya Nabi Ismail AS kerana menjunjung perintah Allah SWT.

Apa yang menakjubkan, setelah baginda Nabi Ismail AS mengetahui dirinya akan dikorbankan, baginda menjawab perkataan ayahandanya dengan dialog di bawah,

"Maka tatkala anak itu (Nabi Ismail) sampai (ke peringkat umur yang membolehkandia) berusaha bersama-sama dengannya (Nabi Ibrahim), (Nabi Ibrahim) berkata: "Wahai anak kesayanganku! Sesungguhnya aku melihat dalam mimpi bahawa aku akan menyembelihmu. Maka fikirkanlah apa pendapatmu!" Ia (Nabi Ismail) menjawab: "Wahai ayah, jalankanlah apa yang diperintahkan kepadamu; insya Allah kamu akan mendapatkan daku termasuk orang-orang yang sabar"." [As Saffaat ayat 102]

Tingginya tawakkal Nabi Ismail AS dan taatnya Nabi Ibrahim AS kepada perintah Allah SWT menyebabkan Allah SWT mengantikan sembelihan itu dengan seekor kibasy sebagai tanda makbulnya pengorbanan perasaan dalam mentaati perintah Allah SWT.

Selain itu, bulan Zulhijjah ini mendapat kelebihan pada 10 hari terawal. Sebahagian ulama' menyebut, 10 terawal Zulhijjah ini lebih afdhal daripada 10 terakhir Ramadhan dan 10 awal Muharram walaupun tidak dinafikan terdapat pelbagai fadhilat di dalam 10 akhir Ramadhan dan 10 awal Muharram. Hal ini kerana, terdapat di dalam bulan Zulhijjah hari yang paling afdhal di dalam dunia itu hari Arafah.

Al Bukhari meriwayatkan sebuah hadis daripada Ibnu Abbas R.A, Daripada Nabi SAW, Baginda bersabda:

"Tiada hari-hari yang amalan soleh yang paling disukai oleh Allah untuk dilakukan melainkan hari-hari ini (Baginda memaksudkan 10 hari terawal Zulhijjah)." Para sahabat bertanya, "Wahai Rasulullah, Walaupun jihad di jalan Allah tidak dapat menandinginya?" Baginda bersabda, "Walaupun jihad di jalan Allah tidak dapat menandinginya, melainkan seorang lelaki yang keluar berjihad bersama hartanya, kemudian dia langsung tidak kembali." [Riwayat al-Bukhari (969), Abu Daud (2438), Ibn Majah (1727), al-Tirmizi (757)]

Hari Arafah adalah hari ke-9 Zulhijjah merupakan hari jemaah haji melaksanakan wukuf di Arafah. Hari ini adalah hari yang paling afdhal dan paling mulia di dalam dunia sehingga Jabir RA meriwayatkan bahawa Rasulullah SAW bersabda,

"Sebaik-baik hari ialah hari Arafah" (Jami' usul fi ahadis al-Rasul, no 6867)

Diriwayatkan lagi daripada hadis Jabir, Rasulullah SAW bersabda,

"Tiada ada hari yang paling baik di sisi Allah melainkan hari Arafah. Allah turun (rahmat Allah SWT diturunkan) ke langit dunia (tanpa perantara) dan bermegah-megah dengan penduduk langit untuk penduduk dunia lantas berfirman, 'Lihatlah kepada hamba-Ku, mereka berkumpul di hadapan dengan penuh debu, mereka datang dari semua penjuru yang jauh, mereka mengharapkan rahmat-Ku, dan tidak mengharapkan azab. Maka tidak dilihat hari yang lebih banyak pelepasan daripada api neraka-Ku daripada hari Arafah'." (Riwayat Ibnu Hibban (3853), Abu Ya'la (2036) di dalam Musnad).



ZULHIJJAH BULAN BERMESRA DENGAN ALLAH SWT





Hari Arafah juga dianggap mulia kerana pada hari tersebut telah disempurnakan agama yang dibawa oleh Baginda Rasulullah SAW. Perkara ini telah disebutkan di dalam Sahih Bukhari dan Muslim, daripada Umar bin al-Khattab RA, terdapat seorang lelaki dalam kalangan Yahudi berkata kepadanya, "Wahai pemimpin orang yang beriman! Terdapat ayat dalam kitab kamu yang jika diturunkan kepada kami orang Yahudi, sudah tentu kami akan jadikannya sebagai hari raya kami." Umar RA bertanya, "Ayat yang mana satu?" Dia menjawab,

"Pada hari ini, Aku telah sempurnakan bagi kamu agama kamu, dan Aku telah cukupkan nikmat-Ku kepada kamu, dan Aku telah redakan Islam itu menjadi agama untuk kamu. Maka sesiapa yang terpaksa kerana kelaparan (memakan benda-benda yang diharamkan) sedang ia tidak cenderung hendak melakukan dosa (maka bolehlah ia memakannya), kerana sesungguhnya Allah Maha Pengampun, lagi Maha Mengasihani."
(Surah al-Ma'ida: 3)

Umar berkata lagi, "Sesungguhnya aku mengetahui hari dan tempat yang telah diturunkan tentangnya iaitu ketika Rasulullah SAW berdiri di Arafah pada hari Jumaat". Diriwayatkan oleh al-Tirmizi daripada Ibnu Abbas dan seumpamanya, beliau telah berkata, "Ia telah diturunkan pada dua hari raya; hari Jumaat dan juga pada hari Arafah."

"Sesungguhnya Kami telah meengurniakan kepada dirimu (wahai Muhammad) kebaikan yang banyak (di dunia dan di ahirat). Oleh itu, kerjakanlah sembahyang kerana Tuhanmu semata-mata dan sembelihlah (haiwan korban sebagai tanda bersyukur). Sesungguhnya mereka yang membenci kamu dialah yang terputus (dari mendapat sebarang perkara yang diingininya)."

Oleh itu, sungguh besar nilaiann hari Arafah di sisi agama yang kita cintai ini. Maka hendaklah kita mengisi hari yang amat mulia di sisi Allah SWT ini dengan amalan kebaikan sekurang-kurangnya tidak berbalah dan memutuskan silaturrahim demi menjaga kesucian hari yang mana Allah SWT mengampunkan dosa selama dua tahun orang-orang yang berpuasa padanya seumpama disebutkan oleh Abu Qatadah RA, bahawa Rasulullah SAW bersabda apabila ditanya tentang puasa pada hari Arafah,

Sabda Rasulullah SAW

"Tidak ada hari yang amal soleh padanya lebih Allah cintai daripada (amalan yang dilakukan) pada hari-hari ini, yakni 10 hari yang awal bulan Zulhijjah."

ILMU FARDHU AIN MENURUT MANHAJ AHLI SUNNAH WAL JAMAAH

Disediakan oleh: Mohd Khalid Hafeez bin Mohd Nazir
Pegawai, Unit Imarah, Bahagian Masjid Jamek Negeri Sarawak

**Rasulullah SAW
bersabda:
Maksudnya:
Menuntut ilmu itu
(Ilmu Fardhu `Ain)
adalah wajib ke
atas setiap Muslim
[Hadith diriwayatkan oleh
al-Bayhaqi]**


Menurut hadis ini, maklum bahawa ilmu yang wajib dituntut adalah ilmu yang disebut sebagai ilmu Fardhu 'Ain. Sekiranya kesemua ilmu wajib dituntut, maka semua manusia berdosa kerana kita tidak mampu untuk mempelajari kesemua ilmu yang ada di dunia ini.

Maka, yang disebut sebagai ilmu Fardhu 'Ain itu hanyalah tiga (3) iaitu :

1. Ilmu Aqidah
2. Ilmu Fiqh
3. Ilmu Tasawwuf

Ilmu Aqidah adalah ilmu yang paling utama untuk dipelajari. Ilmu ini membincangkan tentang iktikad kita dan juga dikenali sebagai ibadah batin. Mazhab kita di Malaysia dalam bidang Tauhid atau Aqidah ialah Imam Abu Hassan Al-Asya'ari dan Imam Abu Mansur Al-Maturidi. Perbincangan dalam ilmu aqidah ini ialah mengenai sifat-sifat wajib bagi Allah dan Rasul, sifat-sifat Mustahil bagi Allah dan Rasul serta sifat-sifat harus bagi Allah dan Rasul berserta dalil-dalilnya sama ada secara ijmal (ringkas) atau tafsili (terperinci).

Ilmu Fiqh pula berkaitan dengan ibadah dan muamalah sehari-hari kita sama ada perihal solat, zakat, puasa, haji, umrah, jual beli, sembelihan dan sebagainya.



Mazhab ikutan kita di Malaysia dalam bidang Fiqh pula adalah Al-Imam Muhammad Ibn Idris Asy-Syafie atau lebih dikenali dengan gelaran Imam Asy-Syafie.

Ilmu Tasawwuf juga dikenali sebagai ilmu akhlak ataupun ilmu adab. Ilmu ini merupakan ilmu penyucian hati daripada sifat-sifat mazmumah dan menghiasai peribadi dengan sifat-sifat mahmudah. Rujukan kita dalam ilmu ini ialah Imam Junaid al-Baghdadi dan Imam Abu al-Hamid al-Ghazali.

Maka menjadi kewajipan kepada setiap mukallaf untuk memperkemaskan diri dengan ketiga-tiga ilmu yang telah disebutkan sebelum ini (Akidah, Fiqh dan Tasawuf) sebelum mempelajari ilmu-ilmu yang lain. Ini kerana, penetapan hukum Fardhu 'Ain ke atas ilmu-ilmu di atas menunjukkan haram hukumnya sekiranya kita mengabaikan untuk mempelajarinya.

Ini juga sesuai dengan resolusi Konvensyen Aqidah 2014 yang diadakan di Negeri Sembilan yang telah menetapkan kriteria Ahli Sunnah Wal Jamaah seperti berikut :

"Akidah Ahli Sunnah Wal Jamaah yang berteraskan manhaj (prinsip) Asya'irah dan Maturidiyyah dalam bidang tauhid, berpegang dengan mazhab Syafie dalam bidang fiqh dan mengikut jalan Syeikh Junaid al-Baghdadi dalam bidang tasawuf."

Kesimpulannya, kita sebagai masyarakat turut berperanan dalam menjaga kepentingan aqidah dan fahaman Ahli Sunnah Wal Jamaah di Sarawak khususnya dan Malaysia secara amnya dengan memantapkan diri melalui ilmu-ilmu yang benar.

INFO RINGKAS

MAZHAB HANAFI

Mazhab Hanafi dinamakan sempena Imam Abu Hanifah Nu'man bin Tsabit (699-767 Masihi/ 89-157 Hijriah) yang menetap di Iraq. Beliau hidup di zaman pemerintahan Umayyah dan Abbasiyah.

MAZHAB MALIKI

Mazhab Maliki dinamakan sempena Imam Malik bin Anas (711-795 Masihi/ 93-179 Hijriah) yang menetap di Madinah. Beliau juga hidup di zaman pemerintahan Umayyah dan Abbasiyah.


MAZHAB SYAFII

Mazhab Syafii dinamakan sempena Imam Muhamad bin Idris al-Syafii (767-820 Masihi/ 150-204 Hijriah) yang lahir di Palestin dan pernah menetap beberapa kawasan di Asia Barat seperti Mekah, Madinah, Yaman, Iraq dan Mesir. Mazhab ini terkenal juga dengan dua pandangan Imam Syafii iaitu qaul jadid dan qaul qadim. Imam Syafii juga dianggap pelopor kepada ilmu Usul Fiqah, suatu ilmu yang membincangkan kaedah penetapan hukum-hukum.

MAZHAB HANBALI

Mazhab Hanbali dinamakan sempena Imam Ahmad bin Mohamad bin Hanbal (780 -855 Masihi/ 164-241 Hijriah) yang menetap di Iraq.

YOU ARE NOT YOUR THOUGHTS YOU ARE NOT YOUR EMOTIONS



Yes you have thoughts AND emotions, and a lot of times they may reinforce each other, which leads you to feel like it is truth. But there is YOU behind them. A YOU that watches and listens to these thoughts and feels these emotions.

Your thoughts aren't going anywhere. We can't stop them, and trying to fight them, especially getting angry at them, is like fanning the flames. It only makes them stronger!

Instead, try this simple reframe: Next time you are feeling overwhelmed by thought, repeat the same thought to yourself but insert the phrase, "I'm HAVING the THOUGHT that..."

For example, rather than saying "I CAN'T do it" say "I'm HAVING the THOUGHT that I can't do it"

See the difference? Notice how your thoughts become less intense and have less power over you, with this one simple change in language.

Remember, you cannot stop negative thoughts. But you can stop listening to them and taking them seriously.

By: Mira Sharkawi, Psychology Officer, LAKMNS

This New Year...

When you make the decision to change your life for the better, everything in you will be shake. Your spirit will be fighting! And every flesh in your body will try to pull you down.

You will want to give up. And you will be tempted to go back - to old acquaintances, old comfort zones, old habits, and old ways.

Everything in you will tell you you're not worthy to be free, to be clean, to begin again.

But this new year, God willing, things are going to be different. It will be the year that you finally escape, the gravitational pull - of the enemy's whispers.

Your future has more to offer you, than your past has to burden you. The reason you made it to this new day, despite the scars, despite the failures, despite the illnesses, is because God still has a plan for you.

Keep your head up high. And keep on keeping on.

Salam Maal Hijrah 1443H

By: Mira Sharkawi, Psychology Officer, LAKMNS



HIJRAH



Madu Lebah

Dari Pandangan Islam

Disediakan oleh : Heiruzam Filani, Pembantu Tadbir

**“Dan Tuhanmu mewahyukan kepada lebah:
“Buatlah sarang-sarang di bukit-bukit, di
pohon-pohon kayu, dan di tempat-tempat
yang dibina oleh manusia”. Kemudian
makanlah dari tiap-tiap (jenis) buah-buahan
dan tempuhlah jalan Tuhanmu yang telah
dimudahkan (bagimu). Dari perut lebah
itu keluar minuman (madu lebah) yang
bermacam-macam warnanya, di dalamnya
terdapat ubat yang menyembuhkan bagi
manusia. Sesungguhnya pada yang demikian
itu benar-benar terdapat tanda kebesaran
Tuhan bagi orang-orang yang berfikir.”**

(Q.S. An-Nahl : 68-69)

Madu memiliki kandungan kalori yang cukup tinggi. Satu sudu madu sekurang-kurangnya mempunyai 64 kalori sementara gula hanya mengandungi 49 kalori dalam jumlah sama.

Ada juga disebutkan dalam hadis, bahawa Nabi s.a.w bersabda “Berubatlah kamu dengan dua jenis ubat yakni madu dan al-Quran”.

Kehebatan madu sebagaimana disampaikan Al-Quran telah terbukti secara saintifik dan dibahaskan secara ilmiah di seluruh dunia.

Madu lebah sebagai ubat penyembuh penyakit sudah dibuktikan secara ilmiah oleh para pakar perubatan. Inilah salah satu bukti kebenaran ayat Al-Quran yang wajib diyakini umat manusia.

Ibnu Sina (890-1037), salah seorang tokoh kedoktoran dunia dan ilmuwan Islam di abad ke-10 Masihi, mengulas mengenai khasiat madu lebah dari segi kesihatan di dalam dunia kedoktoran.



Ita mampu dapat menyembuhkan berbagai penyakit dari yang ringan sampai yang berat, seperti tekanan darah tinggi dan jantung.

Madu juga dapat menurunkan suhu badan serta menyediakan dan mengatur rembesan, sehingga dapat menghilangkan penyakit demam.

Disini kita dapat simpulkan bahawa madu merupakan makanan sunnah dan mengandungi banyak khasiat dan dijadikan ubatan sebagaimana yang termaktub di dalam Al-Quran.



Membangunkan Masjid Sebagai Langkah Pertama

Setelah Rasulullah berhijrah ke Madinah, bagi menzahirkan syiar Islam yang selama ini mendapat penentangan ketika di Makkah, maka Baginda mengambil keputusan untuk membangunkan masjid.

Bukan hanya sekadar untuk mendirikan solat bagi mendekatkan diri seseorang hamba kepada Allah, tetapi juga masjid itu berfungsi sebagai tempat untuk menyampaikan ilmu dan tempat untuk bersilaturrahim.

Kawasan masjid dan rumah Rasulullah di Madinah itu pada asalnya adalah tempat untuk mengeringkan kurma, milik Sahal dan Suhail iaitu dua pemuda yang berada di bawah asuhan Sa'ad bin Zurarah.

Pada ketika itu, Rasulullah menyampaikan hajat untuk membeli tanah itu, tetapi ditolak oleh Sahal dan Suhail kerana mereka ingin menghadiahkan saja kepada Baginda.

Namun, Rasulullah menolak pemberian mereka dan memilih untuk membayar tanah itu. Setelah memiliki, Baginda dan para sahabat membersihkan kawasan itu yang terdapat pohon kurma, kuburan orang musyrik dan reruntuhan bangunan.

Rasulullah bersama para sahabat mula membina masjid, digunakan bahan seperti batubatu dan pelepas kurma. Di bahagian utara, dibangunkan juga khemah untuk para sahabat yang bahagian itu digelar sebagai As-Shuffah.

Pintu-pintu masjid terdiri daripada tiga bahagian, iaitu:

Pintu di belakang masjid dari arah selatan.

Pintu dari arah timur yang juga bahagian masuknya Rasulullah yang mana pintu itu berhadapan secara langsung dengan pintu rumah Aisyah.

Pintu dari arah barat yang disebut dengan pintu rahmat atau pintu Atikah.

Rujukan : Kitab Sirah Nabawiyyah (Dr Ali Muhammad As-Shallabi)

ADA 3 BUAH MASJID UTAMA YANG DIMULIAKAN UMAT ISLAM:

Masjidil Haram di Makkah – tempat Ka'bah, kiblat solat umat Islam.

Masjid Nabawi di Madinah

Masjid Al-Aqsa di Al-Quds (Jerusalem), Palestin

KALAU TAK MENYIBUK, TAK BOLEH KE?

Tajuk ini merujuk kepada peristiwa di mana Baginda Nabi SAW ingin berhadapan dengan peperangan yang memerlukan bantuan sedekah dari kaum muslimin untuk menyiapkan keperluan-keperluan peperangan.

Nabi: **Siapa di antara kamu yang mempunyai kelebihan harta, maka hendaklah bersedekah. Terdapat seorang sahabat datang membawa segenggam gandum.**

Beliau berkata: **Ya Rasullullah, sesungguhnya saya mendapat dua bungkus gandum. Satu saya beri engkau.**

Seorang sahabat berkata: **Ya Rasullullah, saya tiada apa-apa untuk bersedekah kecuali kain serban yang ada di kepala yang mungkin ia boleh dijual untuk mendapatkan duit atau harta.**

Lalu, serbannya dibuka satu atau dua helai dan diberikan kepada Rasullullah.

Abdul Rahman Bin Auf berkata: Ya Rasullullah, saya ada menyimpan 4000 untuk kambing dan keluarga sementara 4000 lagi akan aku serahkan kepada engkau di jalan Allah.

Nabi: **Semoga Allah memberkati harta yang engkau simpan dan beri.**

Tidak semua sahabat memiliki kedudukan ekonomi yang sama.

Dalam hal ini, Nabi menghargai setiap pemberian dan tidak merendahkan pemberian orang walaupun yang diberi itu sedikit dan tidak terlihat untuk melebihkan orang yang memberi dalam kuantiti yang banyak. Masing-masing diberi penghargaan oleh Baginda kecuali kaum munafik yang kerjanya asyik merungut.

Di dalam fikiran mereka, adakah dengan pemberian serban dan gandum yang sedikit itu mampu membantu Nabi? Walhal mereka tidak memberi apapun kepada Nabi.

Balasan dari Allah bergantung atas apa yang kita lakukan.

Walaupun kelihatannya pemberian kita sedikit tetapi ikhlas itu lebih baik dari merendahkan pemberian orang lain dan tidak menyumbang apa-apa.

Berdiam dirilah apabila tidak mampu memberi. Sesungguhnya Allah tahu apa yang kita lakukan.



Gambar Hiasan



Gambar Hiasan



Gambar Hiasan

TIKET UNTUK MENGADAP ALLAH

<https://iluvislam.com/tiket-untuk-mengadap-allah/>

Setiap kali tibanya bulan Ramadan, ayat ke-183 daripada Surah al-Baqarah sering kali kedengaran di corong-corong radio dan kaca televisyen.

Ayat tentang ibadah puasa di bulan Ramadan. Namun, tahukah kita apakah sebenarnya natijah yang ingin diraih daripada ibadah ini?

Takwa. Itulah natijah yang seharusnya dikehjahan oleh setiap Mukmin di sepanjang bulan Ramadan dengan berpuasa. Dengan takwa, momentum Ramadan dapat dikekalkan walaupun sedikit sehingga tiba Ramadan yang berikutnya.

MUKIMIN YANG BERTAKWA

Allah SWT berfirman yang bermaksud: "Wahai orang-orang yang beriman! Kamu diwajibkan berpuasa sebagai amanah diwajibkan atas orang-orang yang dahulu daripada kamu, supaya kamu bertakwa." - QS Al-Baqarah 2: 183)

Jika diperhatikan, dengan jelas Allah tujuhan ayat ini kepada orang-orang beriman tentang kewajipan berpuasa di bulan Ramadan.

Kemudian, diakhiri pula dengan ungkapan "supaya kamu bertakwa."

Hal ini bermakna, orang Mukmin yang menjalani ibadah puasa di bulan Ramadan, natijah yang diharapkan ialah takwa.

Namun apakah pula takwa? Antara takrifan takwa ialah berlindung.

Apabila disebut "Bertakwahlah kepada Allah!" bermakna jadikanlah Allah sebagai pelindung.

Justeru, itulah yang diharapkan oleh setiap Mukmin. Setiap kali tibanya bulan Ramadan dan menjalani ibadah puasa, seolah-olahnya kita sedang memperbaharu benteng kita.

BENTENG BAGI MENGHADAPI GODAAN HIDUP.

Caranya dengan menuaikan segala perintah Allah dan menjauhi segala larangannya.

Dari situ, kita akan sentiasa mendapat perlindungan daripada Allah sehingga bertemu Ramadan yang berikutnya.

Itulah maksud menjadi orang yang bertakwa.

TIKET MENJADI TETAMU ALLAH

Mengapa perlu menjadi orang yang bertakwa? Itulah persoalan yang mungkin bermain di minda kita.

. Benar, perkataan takwa ini sering kali disebut.

Namun, sayangnya nilai takwa itu sendiri tidak ramai yang tahu sehingga apabila berakhirnya bulan Ramadan, diri kembali menjadi seperti sebelumnya. Tiada apa-apa perubahan.

Sebenarnya, takwa merupakan tiket untuk kita menjadi tetamu Allah di Padang Mahsyar kelak.

Bagi tiket untuk memasuki stadium bagi menyaksikan perlawanan bola sepak.

Namun, tiket takwa lebih besar nilainya daripada tiket biasa. Tanpanya, sudah tentu kita akan terlepas saat-saat yang agung ini.

Buktinya? Firman Allah SWT: "(Ingatlah) hari Kami himpukkan orang-orang yang bertakwa untuk mengadap (Allah) Ar-Rahman dengan berpasukan-pasukan." -QS Al-Maryam 19: 85)

Justeru, dapatlah disimpulkan bahawa hanya orang yang bertakwa sahaja yang bakal mendapat kemuliaan mengadap Allah SWT.

Maka, salah satu cara untuk mendapatkan tiket takwa ini adalah dengan berpuasa di bulan Ramadan. Usahakan yang terbaik agar tiket ini dapat diperoleh.

Ya Allah, kami bermohon agar tergolong dalam hamba-hamba-Mu yang bertakwa. Amin.

Agar kelak kami dapat mengadap-Mu di akhirat. Pandulah tingkah laku kami agar sentiasa berada di jalan takwa. Amin.

INTERNET RADIO ISLAMIC SARAWAK

**ISNIN - JUMAAT
10 PAGI - 4 PETANG**



Sila Imbas QR Code Ini
Untuk Muat Turun Aplikasi IRIS



GET IT ON
Google Play

Download on the
App Store



NANG STEADY

